

I z v j e š t a j

o poduzetim aktivnostima vlasti Bosne i Hercegovine u cilju provedbe preporuka sadržanih u paragrafima 35 i 71 Izvještaja Evropskog Komiteta za sprječavanje torture i neljudskog ili ponižavajućeg postupanja ili kažnjavanja

U skladu sa preporukama, komentarima i zahtjevima za dostavljanje informacija koje je formulirao Evropski Komitet za sprječavanje torture i neljudskog ili ponižavajućeg postupanja ili kažnjavanja (CPT) u Izvještaju CPT-a, a nakon obavljenog monitoringa u Bosni i Hercegovini u periodu od 19. do 30. marta 2007. godine, vlasti Bosne i Hercegovine su u obavezi dostaviti dva izvještaja, prvi izvještaj vlasti Bosne i Hercegovine odnosi se na odgovore po preporukama sadržanim u Izvještaju CPT-a u paragrafima 35 i 71, sa obavezom dostavljanja odgovora vlasti Bosne i Hercegovine u roku od tri mjeseca.

Vijeće ministara Bosne i Hercegovine je na 24. sjednici održanoj 27.09.2007. godine razmotrilo i usvojilo Izvještaj Vijeću ministara Bosne i Hercegovine Evropskog Komiteta za sprječavanje torture i neljudskog ili ponižavajućeg postupanja ili kažnjavanja (CPT).

Ministarstvo za ljudska prava i izbjeglice BiH i oficir za vezu vlasti Bosne i Hercegovine sa Evropskim Komitetom za sprječavanje torture i neljudskog ili ponižavajućeg postupanja ili kažnjavanja koordinirali su aktivnosti sa resornim institucijama Bosne i Hercegovine i Federacije BiH, odnosno sa Uredom ombudsmana BiH, Ministarstvom pravde Federacije BiH, Tužiteljstvom Federacije BiH i Kantonalnim tužiteljem Zenica, sa obavezom sačinjavanja odgovora na paragrafe 35 i 71 Izvještaja CPT-a.

Ured ombudsmana BiH obavijestilo je Ministarstvo za ljudska prava i izbjeglice da je Sekretarijatu CPT-a dostavio Specijalni izvještaj o posjeti Kazneno popravnom zavodu Zenica po preporuci istaknutoj u paragrafu 35 Izvještaja CPT-a.

Federalno tužiteljstvo dostavilo je Izvještaj CPT-a svim federalnim tužiteljima u Federalnom tužiteljstvu FBIH, kao i svim glavnim kantonalnim tužiteljima u Federaciji BiH, a u svrhu upoznavanja sa navodima istoga.

Pri tome je posebno preporučeno upoznavanje sa uputom datom na stranici 51. Izvještaja CPT-a, a koja govori o obavezama postupanja tužitelja u slučajevima kada osumnjičeni za kaznena djela tvrde da su zlostavljeni od strane službenika za provođenje zakona. Ujedno, glavni kantonalni tužitelji u obavezi su da o gornjem Izvještaju upoznaju sve kantonalne tužitelje u njihovom tužiteljstvu, a Federalno tužiteljstvo FBIH podsjetilo je sve glavne kantonalne tužitelje u Federaciji BiH da su obavezni da detaljno istraže sve slučajeve zlostavljanja pritvorenih ili osuđenih lica od strane ovlaštenih službenih osoba iz policije i zatvorskih ustanova. Glavnim kantonalnim tužiteljima naloženo je da Federalno tužiteljstvo FBIH redovno obavještavaju i dostavljaju izvještaje o radu u svim situacijama kada kantonalni tužitelji budu postupali u smislu uputa datih na stranici 51. Izvještaja CPT-a, a koje govore

o obavezama postupanja tužitelja u slučajevima kada osumnjičeni za kaznena djela tvrde da su zlostavljani od strane službenika za provođenje zakona;

- Ministarstvu pravde BiH, kao i Federaciji BiH, dostavljena je preporuka u kojoj je ocijenjeno, s obzirom na dostavljeni Izvještaj CPT-a, da bi bilo neophodno u sklopu predstojećih izmjena kaznenih procesnih zakona u BiH voditi računa o preporukama iz citiranog Izvještaja, te u skladu sa istima utvrditi zakonske odredbe koje se odnose na garanciju zaštite od zlostavljanja pritvorenih osoba, a u pravcu njihovog što bržeg i učinkovitijeg pristupa advokatu, doktoru, kao i trećim licima po njihovom izboru;

- svim federalnim tužiteljima u Federalnom tužiteljstvu FBiH, kao i svim glavnim kantonalnim tužiteljima u Federaciji BiH, dostavljena je radi upoznavanja i odluka Evropskog suda za ljudska prava u Strazburu u predmetu "Colibaba protiv Moldavije" u kojoj je konstatirano, između ostalog, da je počinjen niz ozbiljnih nedostataka u istrazi koju su vodili domaći organi povodom zlostavljanja pritvorene osobe od strane ovlaštenih službenih osoba iz policije, te je došlo i do povrede člana 3. Evropske konvencije o osnovnim ljudskim pravima i temeljnim slobodama. Gornju odluku glavni kantonalni tužitelji dužni su dostaviti svim kantonalnim tužiteljima u svrhu informiranja, s obzirom da cijenimo da je korisno upoznavanje sa istom;

- Ministarstvu unutarnjih poslova Federacije BiH takođe je naloženo da je dužno ispitati sve konkretne slučajeve psihofizičkog zlostavljanja pritvorenih osoba, odmah o tome obavijestiti nadležnog kantonalnog tužitelja, pod njegovim nadzorom prikupiti sve informacije koje mogu biti korisne u kaznenom postupku, te potom istom tužiteljstvu podnijeti izvještaj o počinjenom kaznenom djelu, a u smislu odredbi člana 233. i 234. Zakona o krivičnom postupku Federacije BiH, s obzirom da su tužiteljstvo i policija neupitno pod jasnom zakonskom obavezom da istraže sve slučajeve zlostavljanja;

- Kantonalno tužiteljstvo Zeničko-dobojskog kantona iz Zenice donijelo je nalog o provođenju istrage protiv jedne osobe, inače uposlene u KPZ Zenica na radnom mjestu stražara, zbog postojanja osnova sumnje da je počinila kazneno djelo zlostavljanja u obavljanju službe iz čl. 182 Kaznenog zakona FBiH u sticaju sa kaznenim djelom lake tjelesne ozljede iz čl. 173 st. 1 u vezi čl. 31 Kaznenog zakona FBiH, a u odnosu na osuđenog Gašić Miru. Takođe, predmetno tužiteljstvo je nadležnoj Policijskoj upravi Zenica dostavilo nalog za poduzimanje istražnih radnji, a u cilju utvrđivanja da li su u vezi gornjeg događaja još neke osobe počinile kaznena djela. Istraga u ovome predmetu je u toku;

- Kantonalno tužiteljstvo Zeničko-dobojskog kantona iz Zenice ponovo će preispitati pod kojim okolnostima je došlo do smrti osuđenika Čabrajić Zvonimira, a u pravcu utvrđenja da li je u pogledu smrti imenovanog počinjeno bilo koje kazneno djelo. Istraga tužiteljstva još uvijek nije okončana;

- Kantonalno tužiteljstvo Kantona Sarajevo preispitalo je navode Madžović Fatmira koji se u stvari zove Koca Muamer, o njegovom navodnom zlostavljanju od strane ovlaštenih službenih osoba, a kojom prilikom nije utvrđeno da su navodi imenovanog osnovani. U tom pravcu, želimo posebno napomenuti da je gore imenovani saslušan u svojstvu svjedoka dana 27.03.2007. godine, a kojom prilikom nije tvrdio da je povrede zadobio od strane ovlaštenih službenih osoba iz policije ili Kazneno popravnog zavoda, već u prometnoj nezgodi prilikom bježanja, a nakon čega je i pregledan od

strane medicinskog osoblja u Zavodu za hitnu medicinsku pomoć, u Kazneno popravnom zavodu Sarajevo, te naknadno i od strane ovlaštenog sudskog vještaka za sudsku medicinu.

U predmetu ovoga tužiteljstva broj: A-375/07, dostavljamo Vam konačnu verziju zaključaka donesenih na sastanku sa glavnim entitetskim tužiteljima o ažuriranim preliminarnim zaključcima i preporukama vezanim za program praćenja radnji iz istražnog postupka koji provodi Misija OSCE-a u BiH od 06. novembra 2007. godine, a s obzirom da cijenimo da su zaključci dati u tački 1. bitni kada je u pitanju dostavljeni Izvještaj CPT-a.

Ministarstvo za ljudska prava i izbjeglice BiH po ostvarenoj koprespodenciji sa glavnim tužiteljem Zeničko-Dobojskog Kantona, a u povodu zahtjeva za dostavljanje dokumentacije iz paragrafa 71 Izvještaja CPT-a, dostavljeni su obdukcioni zapisnik Kantonalnog Tužiteljstva Zeničko-dobojskog Kantona i Hemijsko - toksikološka analiza ovlaštenog zavoda iz Republike Hrvatske-Zagreb, u predmetu KTA-466/06, koji CPT-u prosljeđujemo u izvornom tekstu.

